

06/01/1997

Reformasi budaya diutamakan

Daud Awang

JOHOR BAHRU, Ahad - Umno Johor akan memberi penekanan terhadap reformasi budaya sebagai agenda utama dalam usaha mengekal dan memantapkan perjuangannya pada masa depan.

Menteri Besar yang juga Pengerusi Badan Perhubungan Umno negeri, Datuk Abdul Ghani Othman, berkata reformasi budaya perlu diberi penekanan sejajar kehendak dan saranan Presiden parti, Datuk Seri Dr Mahathir Mohamed dalam Perhimpunan Agung Umno, Oktober lalu.

"Reformasi budaya ini meliputi semua aspek termasuk cara berfikir, akhlak, kepemimpinan, perpaduan dan kesetiaan terhadap parti.

"Umno Johor perlu menolak segala bentuk politik wang, karenah mengejar kuasa, mencari kekayaan melalui parti dan pemimpin yang tidak berakhlak," katanya.

Beliau berkata demikian selepas majlis perasmian dan pelancaran dokumentasi 50 tahun Umno Johor di Plaza Kota Raya di sini, hari ini.

Serentak itu, satu pameran bergambar 50 tahun Umno anjuran New Straits Times Sdn Berhad (NSTSB) turut diadakan.

Turut hadir Speaker Dewan Undangan Negeri, Datuk Mohd Ali Hassan; Pengerusi Jawatankuasa Kebudayaan, Belia dan Sukan negeri, Dr Abdul Latiff Ahmad; Setiausaha Kerajaan Negeri, Dr Shahir Nasir dan Penolong Pengarang Kumpulan NSTSB, Ahmad Talib.

Pameran lima hari bertemakan 'Umno Johor memartabatkan bangsa Melayu' dianjurkan dengan kerjasama Yayasan Warisan Johor (YWJ).

Abdul Ghani yakin jika reformasi itu dapat dilaksanakan, Umno Johor akan tetap unggul dan teguh bagi tempoh 50 atau 100 tahun akan datang.

"Setakat ini, kita boleh berbangga dengan apa yang telah dilakukan oleh pemimpin terdahulu yang menjadikan Umno sukar digugat hingga ke hari ini.

"Keadaan ini perlu dikekalkan dan reformasi budaya adalah alternatif untuk memastikan perjuangan dan maruah Umno di negeri ini akan terus kekal dan terpelihara sampai bila-bila," katanya.

Terdahulu dalam ucapannya, Abdul Ghani berharap generasi muda dapat menghayati perjuangan tokoh Umno dalam usaha mencapai kemerdekaan dan memartabatkan bangsa Melayu.

"Kemakmuran dan kejayaan yang dicapai setakat ini adalah hasil perjuangan mereka. Oleh itu, semangat perjuangan Melayu perlu diteruskan bagi memastikan bangsa Melayu terus disegani oleh bangsa lain," katanya.

Abdul Ghani berkata, perpaduan dan kesetiaan terhadap parti penting jika ingin melihat Umno terus cemerlang dan menjadi tulang belakang kerajaan.

"Umno adalah kerajaan dan kerajaan adalah Umno. Oleh itu, kekuatan Umno penting jika kita ingin melihat maruah orang Melayu akan terus dipelihara," katanya.

(END)